

NOS SONS A DERIE TEMPS : LAI FELICIE VAIT EN VELLE

Lai Mèrie : Voichi lai Félicie ! qué temps qu'è veut faire ? I veut tchoère des bôs ? Bondjouè Félicie, çoulai vait-i ?

Lai Félicie : Bondjouè Mèrie, ç'ât vrâ qu'è y é grant qu'i n'seus pouè v'ni, mains vôs saites c'que ç'ât : â dérie temps an n'é pouè enne m'nute taint qu'les vaïches n'sont pouè è lai roitche

Lai Mèrie : Vôs èz brâment bîn fait d'veni, i seus tot po moi, lou Tiennot ât aivu en lai tcheusse.. Las moi, è n'é voûere lou temps d'y allaie

Lai Félicie : An m'é dit qu'èl aivait dje bîn tuaie des lievres

Lai Mèrie : oh ! enne dozaine, pé pus !

Lai Félicie : c'n'ât dje pé ran ! Lou Milo , lu, è n'y vait qu'lou duemoine : èl é tuaie ïn bé r'naid !

Lai Mèrie : Vôs dairîns faire airraïndgie lai pé, po vôs faire enne belle forrure !

Lai Félicie : Aye ! Mains çoulai côte tchie ! Et peus è fât ritaie è Béfoûe !

Lai Mèrie : Bîn chur, mains an n'é ran po ran... I vois qu'vôs èz aïppoutchè d'l'ôvraïdgie.

Lai Félicie : C'ât enne pare de tchâsses è r'pâre. Lou Tatave en yuse aïtaint qu'ïn tiurie n'en peut b'nâtre !

Lai Mèrie : Moi i ai botè en train enne tô et peus ïn lessue è brôdaie.

Lai Félicie : eh bîn, vôs êtes coraidgeouse !

Lai Mèrie : oh nian ! i fais d'vaint moi, tiaïnd qu'i ai l'temps. E y é dje bîn ïn mois qu'ç'ât ecmençie ! an n'y rite pouè aïpré !

Lai Félicie : Moi, è m'fât r'faire enne tchevietche : mains ç'n'ât pouè lai poinne d's'y botaie tiaïnd qu'an ât todje déraïndgie et peus i ai ïn grôs moncé d'lainne è briejaie.

Lai Mèrie : I m'pense qu'vôs èz fini vot' traivaiye dains les tchaimps ? Lou temps é bîn tchemnè c'dérie temps, c'n'ât pouè t'aivu enne croûeye onnaie, è y é t'aivu encouè bîn di butin ; i ai vu en péssaint d'vaint vos bèdes qu'elles étint belles .

Lai Félicie : Aye , mains les poirattes, è y en aivait brâment d'marlieres. poétchaint nôs ains fait quèque bons tchés d'voiyîn.

Lai Mèrie : E y é todje è faire. Adjedeû lou Tiennot ât en lai tcheusse, mains hyié èl ât aivu tieudre di tchievre-djone : nôs aivîns dempie yünne raimaisse po écouvaie les allaies d'l'étâle... Et peus vot' Titine èlle vait r'virie en l'écôle ?

Lai Félicie : Ben mitnint qu'èlle é son certificat èlle vait piedre son temps è c't'écôle. E y é prou è faire è l'hôtâ. Tiaïnd qu'an é di laicé qu'an n'bèye pouè è laicelie, ç'ât lée que vire lai signeule di baiturôt ; èlle vait tieuri l'bôs po les fouenots, èlle fait tossie les vélots... vôs voites...

Lai Mèrie : ç'ât chur, les féyes aint yot trôssé è faire, èlles sont vit'ment boènes è mairiaie... En câsaint d'çoulai, vôs cognâtes lai novèlle ?

Lai Félicie : Ma foi nian ! nôs sons r'tiries di v'laidge, nôs n'sains ran !

Lai Mèrie : Eh bîn fidiurites-vôs qu'lai louise di Paul ât oblidge de s'mairiaie, èlle ât gonçe !

Lai Félicie : ç'n'ât p'vrâ !

Lai Mèrie : âchi vrâ qu'i vôs l'dis !

Lai Félicie : Câjites-vôs ! Son pére que se r'drassé taint ! E dait faire ïn bé tchoûeré.. et peus daivô tiu ? an l'sait ?

Lai Mèrie : Daivô c'gouïlland d'Blaise de Brev'lie, que ât pieu tos les dimoûennes â soi.

Lai Félicie : ç'n'ât pouè pössibye ! Vôs m'en bouëtchites ïn câre ! Mains qu'ât-ce que les baichattes aint dains lai tête è c't'heure ? C'n'ât pouè des rujes ces qu'aint des féyes è mairiaie !..

Lai Mèrie : Es l'aint in pô tieuri : ès l'aint léchie ritaie l'dimoûenne, des côps djunqu'â mineut péssè !

Lai Félicie : ç'n'ât pouè l'tot de s'mairiaie, qu'ât-ce qu'ès v'lant faire aipré ?

Lai Mèrie : An dit qu'lou Blaise vait v'ni dgeindre !

Lai Félicie : Mon Dûe, tchie l'Paul v'lant être brâment empoiss'nès daivô ci boiyou ! çoulai n'vait pouè durie grant ! Ci Paul qu'ât se bon ôvrie ! que n'pie pouè in môment ! Ma foi i les pyains !

Lai Mèrie : An n'é p'fâte de s'brijie lai tête po raimessaie in pô d'butin, tiaind qu'an muse qu'in dgeindre peut tot ébieûgi ! Ma foi ç'ât bin trichte, et peus ç'ât tot !

Lai Félicie : Encouè quèques djouès, et peus nôs v'lans poyait allaie ès lôvres, les dgens n'aint pouè fini d'en djasaie !

Lai Mèrie : vôs v'lèz pâre enne étchéyatte de cafè ?

Lai Félicie : Vôs craites ? Et peus se è m'empêche de dremi ?

Lai Mèrie : lou mîn n'veut pouè vôs empêchie de dremi, è n'ât pouè se foûe ! vôs voitès i aî d'l'âve que tieût, è n'y en é pouè po grant temps !